

四明叢書

張宗祥

梓材諸案吳禮部送趙伯器序言其嘗挾二季游
江湖賢士大夫閒先生其一也其一人則無可考
矣

學正門人

補文肅鄧匪石先生文原

雲濠謹案先生文集曰素履齋稿所著又有讀易
類編

梓材謹案吳草廬爲先生神道碑云趙承旨子昂
歷言其師友姓名而善之與焉

梓材又案先生所著又有巴西先生文集其爲翰
林侍講學士貫公文集序云獲事翰林承旨姚先

生蓋謂姚牧庵也又爲季先生墓誌銘云文原于
先生僅獲一執贄于將命者而先生之學亦弗克

究厥施云云不可謂非季氏門人矣又刑部尙書
高公行狀云文原自公爲都事使俛首受公知亦

與在舉中則大同趙氏亦其受知師矣

素履齋稿

昔之學者常患其不如古人今之學者常患其不勝古人求勝古人而卒以不如予不知其可也

胡雲峯四書通序

萃之彖曰萃聚也觀其所聚而天地萬物之情可見矣夫復可以見天地之心而不及其情大壯見天地而不及萬物維咸恆萃則天地萬物之性皆可見而萃又統咸恆之萬而歸于一者也其象澤上于地若陂水以漸其盈以沛厥施與麗澤講習之義可以類觀故學之有

資于萃聚又如此吾夫子之言曰既會通以行其典禮
惟會故通不會不通也

汪又善四書類編序

自四書之學行家傳而人誦之矣求諸致知而力行者
率千百不一二自世之論儒者常以是相詬病凡道必
有對待自陰陽剛柔仁義引而伸之不可殫盡學者每
有所偏或舉一而遺其二從其易而不究其所難故去
道日遠聽言視行聖人猶爲宰予而改矧去聖人若是
其遠也哉夫圖也書也致知之事也而未及乎力行也
傳之書者可圖也傳之心者不可圖也必得傳心之妙

而後可與學道

程子見四書章圖序

竊維帝之平水土也九賦既均又曰六府三事以示天下萬世治道之本獨洪範九疇未嘗爲虞帝敷陳其說後千有餘年箕子始以爲武王告使箕子蒙難而不獲信其志又無武王者興則九疇將遂湮而無傳乎自夏歷商孰傳之而至箕子其事遠莫可考世知帝功與天地並而洪範九疇鮮有能研精理奧究諸力行者使其書徒以言語傳漢儒旁摭庶徵推致五行其言非不較著明甚而先王綜理天下之要亦已微矣八卦九疇道

相經緯天所以昇聖人者豈偶然哉

帝禹廟碑

鄧匪石語

經籍之弗墜翳漢儒是賴

六經之書先聖王之道在焉故六經在天地亘萬古而無敝有興衰治亂之不常者人也而非書也

附錄

公六歲入小學九歲從三山楊先生受春秋

既見科舉事廢遂一意務爲聖賢之學開門授徒戶屢常滿

成宗崩預纂修實錄姚文公王文肅公並爲承旨持見
不同閱公所具稿互有指摘公不與辨第令櫝藏以俟
後數日二公取視之皆莫能易一字

出爲江浙等處儒學提舉教人先學行而後文藝士習
爲之不變士子或爲私書以非考亭之學公命毀其書
曰吾以息邪說也

鄧氏同調

州判白湛淵先生珽

白珽字廷玉錢塘人本四明名儒舒少度遺腹子通武

郎嶸育以爲嗣五歲能屬詞八歲能賦詩十三受經太
學有聲場屋閒元丞相伯顏平江南聞其賢檄爲安豐
丞不赴客于藏書之家晝繙夜誦鐙墮花穴帽不知也
如是者十有七年嘗游梁鄭齊魯歷覽河山之勝登臨
弔古訊人物風土慨然有尙友千載之意李文簡衍力
挽起之授太平路儒學正攝行教授事悉心官政修建
天門采石二書院轉常州路儒學教授再遷教授慶元
未上薦陞江浙等處儒學提舉司副提舉時鄧文肅文
原爲之長與先生志氣脗合舉刺得宜文化大行秩旣

滿銓曹有不知先生者署淮東鹽倉大使先生自以鹽
算非所諳習不俟終更卽謝事養病海陵遠近學徒擔
簞相從者無虛月再遷蘭州判官不復出所居西湖有
泉自天竺來及門而匯榜之曰湛淵因以自號晚歸老
棲霞又號棲霞山人天曆元年卒年八十一先生性至
孝自幼至老無一日廢間學故長于詩文戴剡源謂其
注波五經之淵披條百氏之畹蓋確論也所著書曰詩
曰文曰經子類訓曰集翠裘曰靜語皆二十卷黃文獻
言杭都舊事如淮陰龔開嚴陵何夢桂眉山家之異莆

田劉獲西秦張栢虎林仇遠齊東周密凡十餘人相與
倡明雅道而先生齒爲最少乃與羣公相韻頌南北兩
山閒云

宋文憲集

雲稼謹案方桐江送白廷玉如當塗詩序自
署紫陽後學又續集送白廷玉常州教授序

湛淵靜語

邵康節生席不赴蓋有見也伊川生日亦不事飲宴前
修似此者多近劉極齋宏濟蜀人遇誕日必齋沐焚香
端坐曰父憂母難之日也予自幼不逮事父母遇是日
卽齋不葷不酒旣仕雖出亦齋不嬉笑不與讌席此當

爲事也惟年老欲勉從子孫之道則于齋祭之次日爲
壽猶或可也

魯齋續傳

補隱君牟靜正先生楷

靜正遺文

孔子曰民可使由之不可使知之徒由之而不求以知
之可乎哉然禮有冠昏喪祭而獨有取于喪何歟禮之
行由于俗之厚俗之厚由于喪之重也周公所以成周家
忠厚之俗亦惟喪祭之重而已喪祭之重民俗之厚也

民俗厚而後冠昏之禮可行矣

車氏內外服制通釋序

附錄

持身嚴肅鄰里沾化爲文章以性命爲先辭華爲後

詹先生道傳

詹道傳臨川人著有四書纂箋二十六卷用魯齋先生所定之句讀會近代諸儒之箋釋而考訂之藏于家塾以授其徒建陽陳子善鏗而行之胡一中爲之序

經義考

梓材謹案四庫全書目著錄先生四書纂箋二十八卷提要云是書大致皆有根柢猶元儒之務實

學者與張存中四書通義諸相較固猶在其上矣

牟氏同調

補
隱君陳西山先生紹大

附錄

先生嚴毅方正未嘗言人過失

白雲家學

補
祭酒許先生元

梓材謹案金華府志載
先生從葉儀范祖幹學

附錄

恪守家教其學一宗朱子非五經四書不讀非濂洛關

閩之學不講

爲國子祭酒十年自稽古禮文之事至于人材進退時政弛張無不預議及修舉廢墜更規設法以教國子

晚至韶卽張文獻公祠以居好事者繪爲南華謫居圖
補教授許先生亨

梓材謹案先生爲白雲先生次子白雲以爲兄璦後有詩集曰構散雜言潛溪嘗爲之序又案東陽縣志言白雲二子明初皆爲大官而死于法

白雲門人

補純孝范伯軒先生祖幹

雲濠謹案金華府志載先生受業白雲許先生之門太祖帥師下婺辟爲諮議以親老辭

附錄

戊戌明太祖下金華與葉儀同召初幸學以大學進講
上命剖析其義先生乃曰帝王之道自修身齊家以至
于治國平天下必上下四旁均齊方正使萬物各得其
所而後可以言治上喜曰聖人之道所以爲萬世法吾
自起兵以來號令賞罰一有不平何以服衆夫武定禍
亂文致太平類此道也甚加禮敬

引誘學者惓惓真切惟恐其不入于善嘗曰君子之所

不可及者其惟人之所不見乎四方士夫嘗問安否爲斯道重輕

方正學曰斯道之微不能無敝苟非賢者則莫振其衰而扶其顛自宋之亡大統中絕顧瞻金華有光燁燁吾儕小子不幸而不見其盛時矣所得見五六公焉曰宋曰胡曰范曰葉此數公者皆百世之士往歲不淑而葉公卒胡公逝旣而宋公薨于蜀范公奄去而不可挽自今以往蚩蚩之眾何所倣而爲善茫茫之緒誰爲之繼而孰爲之延乎

補經略李先生國鳳

梓材謹案先生受業白雲顧考宋潛溪爲聞人凝
熙行狀言凝熙改泉州教授某郡李君國鳳方經
略江南得承制專封拜君嘗從凝熙游知位不稱
其德擢爲福建副提舉是先生又爲聞氏門人也
附錄

嘗序貢玩齋文集曰三代而上文與理具六經之文是
也三代而下文自文理自理言之不能措諸文者有之
矣文之而戾乎理者亦有之矣道何自而明乎

補經師葉南陽先生儀

葉南陽語